

紅
蘭
逸
乘

紅蘭逸乘

長洲張霞房輯

序

紀吳中故事者左氏吳語之文波瀾舒卷有典有則次之若越絕書吳越春秋俱古藻紛披蒼秀欲滴繼之者不亦難乎三國至唐代有紀述而流傳絕少宋范文穆始蒐羅遺佚纂述成書明則盧王三志翦裁有體足爲模範予謂修官書與閉戶漫錄者不同今年春曾有友人強邀入修局志予未之往是稿藏之巾箱僅爲稗野之支談而已矣李青蓮詩吳王舊國水煙空香徑無人蘭葉紅書之名蓋取諸此姑存之以俟博雅者就正焉長洲張霞房識

紅蘭逸乘



3 1764 2085 3

凡例

- 一 無稽之言不錄
- 一 他書多見者不錄
- 一 郡志已載者不錄
- 一 凡他邑之事有關吳中者悉采以備參攷

紅蘭逸乘卷一

長洲張霞房輯

古蹟

姑蘇臺者吳王齊辛所造也昔吳王璧羽嘗與楚戰種弗利而百姓疲敝王將卒有六甲晝見吳之分野

王訓其子齊辛曰烏乎主嚙罔欲保厥國民嚙弗欲保厥家強國罷民國卒越弱公率予多事楚邦厥

一作惟

授侯逞于式師敵北我克尙匪仁君逞民忤焉攸利余疾屬繙漸爾惟保太王之統緒無底失墜余於

地下懷爾勳從茲以往爾姑蘇我民乎烏虛罔達於余言國乃昌子孫其吉民乂而或匪後言訖屬繙

太史藉之藏之玉牘齊辛于是起姑蘇之臺以誌之後十餘世巫臣復通吳于上國而楚人懼

編輯柳

金姆橋在城中通關坊其地古有關也昔吳王齊辛好道王母嘗與齊辛會于此命仙女房奴歌毒南之

曲彈棗鉢之琴後人名橋爲金姆卽西王母也

右二節俱見漂米手牘非越絕書吳越春秋所有也璧羽一作闕羽六甲星名在紫薇垣齊辛二字

見禮記文王世子篇古者太子齊辛以養也二君在壽夢前故不著於春秋

鷗夷二年閏中雨石大者方圓丈餘小者亦大於拳雨及數里不傷人屋後亦無他至今葑門內里許有

大石是其遺蹟也亦載漂米手牘

昔渡僧橋未造時恆有小舡于此渡商賈界二錢孫權時有比丘欲渡舟人先索錢僧故不與舟人叱之

僧怒折一楊枝置水上履之而渡若平地也于是諸商賈爭牽衣拜之多出金造此橋因號曰渡僧柳

乘魚橋下昔有深水今不復爾矣丁法海嘗浴於此見一大鯉甚馴戲跨之忽躍起化爲龍飛入雲端明

日法海貽書友人言赴琴高之約于大言之山看日出五百年後更當來此

孫權時吳中大疫有一老翁憩於橋上衲間掛藥瓶數枚各有識或曰不妄殺人或曰孝或曰悌之類言
瓶有神藥轉死返生求治者不取價但諦視其容色如孝悌者若慈悲者各以類畀之人皆服其藥後
愈幾千人或爲人逆而忍者不應後老翁不知所之今吳中憩橋是也

支遁好乘馬其最重者名曰頻伽嘗飲頻伽於橋下馬洩處忽生蓮花人異之故名橋曰飲馬而橋之西
南有蓮花巷

黃牛坊橋始成時夜半月下有黃牛在其上有喘聲居民視之化作一小龍躍入橋下明日有西番僧至

此曰橋下有寶氣解衣入水得玉龍一枝輕黃色製極精好人欲奪之僧遂行其人足不能行跬步僧
遠不可復追始得行至今稱黃牛坊橋或云戴若思雙柑斗酒聽鷗處故又稱黃鷗坊

右俱錄吳郡疏桐薪云

宋有黃由狀元居此建坊後誤爲黃牛坊然郡志黃由係吳江人有狀元坊在城東南隅其說謬矣

吳子城甚小今之吳宮當作吳股而東西天王堂係子城鼓樓坊猶存舊名通關坊東土岡迤邐蟠繞猶
見城基吳枚菴云吳股者出城之路也

白塔子巷有白塔雕刻佛像今在人家壁中

吳周公瑾故宅至宋爲雍熙寺又明時分其半爲吳郡城隍廟廟中掌庫神祀陸伯言廟外俱明廣孝阡也

申文定公祠在流化坊舊吳縣署也遷署而建祠故今里東有吳縣西橋俗改苑城隍廟東有馬坊街及獄

牢遺址今皆爲民房矣初中有三間齋及池松柏婆羅成林初前有棋杆國朝乾隆辛亥被颶風所折太湖中鼇山形如鼇而中虛巨浪歔吸驚濤激雷其下多鼇其上有野廟在荒榛之中昔湯文正公燬上

方五聖廟五聖之精逃匿山腹村巫私祀之

昔吳淞潮甚猛號霸王潮俗訛傳楚霸王爲厲唐時沿江立漢功臣七十二廟以鎮之肅何紀信輩皆爲土穀神

康王古廟在鐵瓶巷北志云周康王廟并附會以刑措之說未可信也按說鈴述異記亦載杭州康王廟以爲司虎之神殆因有虎患而祀之癸辛雜識云宋元以來平江多虎患也

唐洞庭君柳毅墓在西街五峯園之樓下久已蕪沒有居人晝臥見車馬騶衛入室有美丈夫緋袍玉帶上堂忽不見駭而擲之得碑及金縷懸樞知係柳君所葬不敢犯而止見太倉王吳尙恕軒偶筆今郡中白鶴三鄉廟水仙王廟皆祀柳君也 醋庫巷水仙廟香火極盛堂前有方池頗深乾隆年間賽會觀者擁擠有五歲嬰兒墮入深池浮於水面衆見而拯之手中糕餌紙包猶未濕兒言水中若有人托其背者絕不驚怖其靈祐如此

堅瓠集云予親見長洲縣署露臺下西階甃石是蕭景贇仗義英風之碑

莎衣仙淮陽胸山人宋孝宗賜號通神先生周敕安筆記云墓在齊門外蠡口本號攝家俗呼歇塚郡城東南三十餘里名陳墓湖州府志云宋有陳妃葬此又云宋有好奇之士曰陳震居此近呼池墓雲窗私志云呂蒙讀書臺開西館以延俊髦共相挖揚朝夕稽考識見日進吳大帝益重之今西館橋是也府志作西貫橋

雲煙過眼錄載宋趙伯驥桃源圖乃吳中圓妙觀圖也可想宋時觀中多桃花亦若唐時長安元郤觀矣

元趙子昂書山門記碑真者在松江而吳中所存係翻刻耳圓妙觀唐時爲紫極宮宋稱天慶觀山門碑王

文格公志載之觀前街舊名碎錦街有橋對觀者名碎錦橋錢補履云康熙年間居民鮮少立橋上望見張王

府基一片荒煙蔓草今則塵閉撲地掛轡駕肩矣三清殿有吳道子畫老君像碑廂眉披髮貌極蒼古

宋寶慶年間道士馬大同立又有宋嘉定戊寅一碑在楹桓前明洪武時詔蠲觀中賜田租碑方正學

書碑在今行宮中其碑文明永樂時磨去俗說劉海掃去可笑之甚

蕭王墓在蕭家巷蓋齊梁時貴人葬地因居民造屋掘得古碑而知之近年又聞掘得碑云唐相盧公之

墓未知何人

鳳池園在蕭家巷中園極大池亦廣今分售其地爲三姓所有卽元呂神廟亦其餘地

雪糕橋昔張孝子擲雪爲糕以奉親所居在蕭家巷祠亦在焉其事詳見廣新聞蕭家巷陳氏園池
中卽張孝子葬處

大儒巷以明王仁孝先生所居得名也其祠在護龍街大關廟側所著有俟後編國朝康熙間彭南昀太

史梓行之

城南開元寺後有藏經閣以碑石累成不用樑柱俗呼無樑殿分三門曰阿修羅曰毗毗曇其閣並無經焉有燕國夫人像蓋吳赤烏年捨宅造寺之人也又長畧南有燕家浜府志云昔人於此得石函刻字云燕國夫人首級蓋葬於此是也

盧安山醒已編云寺中舊有三官殿乾隆初年寺僧乏柴斧而薪之矣今遺址存焉又有地藏殿十王殿所塑無常鬼王甚靈常夜出往來地南人皆見之又有臥佛卽如來涅槃雙樹像也

元趙松雪云北禪寺主僧正吾號南屏藏定武蘭亭是其師晦巖熙法師所藏從其借觀不可夫正吾之珍祕蘭亭幾與辨才相似乃松雪借一觀而不許亦太吝矣

西洞庭包山寺傍有竹園宋朝杳菴禪師臨化時手插一枯竹枝於庭後遂生枝葉成竹林矣明萬曆年間閭門內專諸墓壤居民起出石幢一座高僅三尺許四面刻毗盧遮那佛像三面並作思憶相一面撒手不知何代物也今歸寒山

虎邱千佛閣傾圯不可爲遊者無不仰嘆殿學中公捐貲鼎新一日有匠人詣寺自云能整齊之請具香燭花果冥鏹列數百燈夜與同伴三四人閉戶丁丁不輟及曉巍然如故矣一云越東異僧來敲正之府治東有東西兩天王寺唐大歷三年托塔李天王白晝現形其地居民共募造寺中有熾盛光王佛毗盧觀音像其二十八宿猶是唐朝夾紵舊物石韋狀像尤古

趙居士宦光偕黃山人習遠遊洞庭東山法海寺見殿東棟間懸一巨篋訊諸老衲云軸子在內自入教以來三十年矣未有開展不知何軸居士使數百人百計開展乃是陀耶入泥洹畫像也天龍八部人非人等皆號咷躑躅悲慘莫可名狀圖方廣二丈餘一幅素爲之題平江府造四字而無歲月鑒定爲宋政和時物於是率同遊作禮于庭草間嘆未曾有

黃土塔橋明祝京兆嘗宿於其旁有聽鼓記一篇據云府署鼓聲今以理側之當係吳縣署中鼓也若府署在二里之外而云聽之歷歷祝公雖耳聰勝人恐亦未必能如是 地云黃土曲故塔亦云郡中壩塔凡七此其一也

元妙觀西劉進士宅中有石井欄銘曰宋朝奉國寺井蓋其寺址也此寺蓋燬于宋末兵亂今宅前竹葉瑪瑙旗杆墩及門旁滾石俱舊物

船塢巷口井闌石有宋咸淳戊辰年任山明寔立書法甚佳

西美巷宋井有銘字已載竹汀先生日記中矣予觀其名稱永定鄉乃知今鐵瓶巷有永定寺係鄉名也鈞玉巷淮張時宮宅人埋玉之地也故近王府基

勾蘭巷今稱幽蘭巷予聞朱西生云前朝妓家所居

張王得美人擇其最姝麗者貯以蕙香桐芳二閣今桐芳巷在城北隅

中和道院在宋亦係雍熙寺址今分西偏作郡城隍廟東偏仍爲寺而在三國時皆周公瑾故宅也有手

植古柏在道院之古柏山房銅皮溜雨黛色參天撫其老幹半化黃石矣

天宮寺在陸家巷明末有趙凡夫范長白沈朗倩徐照發文文起陳古白蒼雪和尚張以中邵瓜疇陸青章等結放生蓮社於此崇禎時譚元爲住僧元若禪師畫掩關圖卷前有眉公書息影僧誦四大字後有沈建趙雨李瑩杜大受馮夢桂朱篁姚宗典周師文楷篆劉錫石胡汝淳周永年鄭敷教匡崖金俊明顧善周茂蘭僧天童圓悟題詩不寐道人凡二題一在明末一在鼎革之後

白鶴觀記一卷康熙間郡中鴻博馮景撰并書今墨蹟猶存觀中福濟觀崇禎宮道房俱有志亦若僧家之分南北宗

衛前太公廟祀尙父而白起關壯繆祔焉或云古之旗靈廟也唐時武廟祀尙父而白起與關侯列六十四賢中

圓妙觀石觀音殿乾隆甲辰葺門彭氏重修予家助銀二百金大士始裝金焉石像向在牆中不蔽風雨俗稱露天觀音

顧氏依園中有梁妙嚴公主墓楓林蕭瑟池水寒漪遊其間頗有幽靜之致墓上爲妙嚴公主臺前有妙嚴泉繞以妙嚴池今售於錢氏改武肅分祠矣

春草間房在雙林巷金俊明故宅也乾隆年郭祭酒居之予嘗過其家題云不寐道人去草堂依舊閒盆池添水綠石筍到秋斑淨業歸真際風高香莫攀老梅留畫稿偃臥曲闌間予嘗得不寐道人畫梅冊

十二幅清逸奇古頗近邵瓜疇今寫梅者罕有傲之

二株園在周五耶巷明徐勿齋先生宅也揚維斗諸公會文之所花木之盛與范家園爭勝蔡遠山業師買得二株主人石印欲磨去適談二瓢見之歎賞鐵筆篆法之妙乃不磨留之

石馬巷在雙林巷口有宋高宗妃留滯平口歿於此曰娘娘墳墳上石馬歲久靈奇常下岸飲水被人擊去首想此巷卽其香火院也

查先生巷昔有查先生精于黃白之術嘗居此見江淮異人錄

寧隱山麓拈花菴卽福臻禪院之故址也建自梁天監二年在宋爲韶國師道場明永樂間敕賜爲建忠禪院明季頂日徹師又爲庵

周孝子廟在孝義坊廟中有蓬萊井疫歲虔禱于神汲泉飲之可免有神楮面黑鬚捩馬者曰顧太案顧太係國初人業顧繡生平敬祀周孝子歿爲執鞭今凡學繡者尸祝焉曰繡祖而祀以方糕蓋所嗜也春申君廟在鐵瓶巷中神像之旁有皂班曰尹阿爹乾隆年間人爲吳縣伍伯者也

或云姓王生平正直好義

已諾必踐歿而塑像人家有失物者往禱祀以燒酒腐乾并書失物之本末粘其竹片則夜間竊物者必受責撻

羊山一名蒸山以雲氣之常如蒸也吳越春秋吳王夫差殺公孫聖提之蒸邱卽此山戰國策云越王勾踐以散卒三千擒夫差于干隧今萬安鄉有遂山卽其地

張七公土地廟在滄關祀晉張季鷹祭用尊鯪

夫差大王廟在葑門外車坊昔吳王造車處

乾隆丙午葑門外耕者掘得古墓碣云吳興沈萬一之墓知係萬三之兄疑有財寶爭先入壙及入則壙大如三椽屋一棺之外別無長物遂重封揜之嘻象以齒焚翠以羽戕萬二智勝萬三遠矣太倉嘉定縣志云沈萬一名真一安定人富甲一郡明洪武太祖作詩云百僚未起朕先起百僚已睡朕未睡不如江南富貴人日高丈五猶披被萬二聞之嘆云兆已萌矣即以家貲付幹僕肇之買巨舟載妻子汎遊湖湘不二年江南豪右以次籍沒獨萬二以令終夫不十人不足以葬崔子之柩不得隱藏由其有拱壁也楚白公罪同崔子何以卒匿其屍哉無寶故也觀萬二之營壙當不止十人而葬而莫知焉可悟璫璣之不可殮矣

中峯寺在支硎山韓補瓢筆記云中峯巖壑深秀處爲冬青軒何義門先生幼從三近邱師讀書其間壁脚東塗西抹皆其手蹟寺僧以其名重不忍拭去其髻年題壁云清溪十里瀉奔淙尋到源頭出梵鐘山雨欲昏林外塔輕明不掩閣前峯讀書人去巢餘鶴入定僧歸鉢有龍閑掃落花扶瘦竹深山無事不從容又有十九日拉伴山峯觀覽小雨急歸云越山吾所愛一雨罷登臨小得蓬窗韻全乖蠟屐心無聲宵漲潤有影曙峯深好訂重來約情于到未尋又一首云牢落中峯寺無僧竹樹清矮牕看山色高枕聽溪聲又二句云清坐北窗無一事閒看小鳥捉飛花詩後咸書煒字爾時八法未工筆姿端正

雅秀頗似閨秀簪花體格 情於到末尋句疑有誤字

明初王賓

吳人

輯虎邱詩一卷載元郝經詩云虎邱山前新築城虎邱寺裏斷行人呂敏詩云山上樓臺山

下城朱旗夾道少人行曾朴詩云闔閭塚上見新城無復遊人載酒行其年乃至正丁酉淮張用事周

南老詩云白髮趨公役馳驅上虎邱又云四疊新城繞劍池劍池池上碧崔嵬蓋南老方爲澤門之哲

董其事也虎邱古名海湧峯必有危巒列岫之勝乃夫差築臺于前士誠造城于後遂壑雲巖剗削不

遺餘力豈復廬山眞面目耶嘗見明文衡山唐六如文嘉袁尙統居節所寫虎邱圖皆畫後山景聞前

輩云明朝虎邱山門在今後山也嘗題劍池云飛去魚腸劍池空石氣涼古桐高百尺宿雨滴寒香

荻樓雜抄云張香橋昔有女子姓張名香與所歡會此故云今月明之夜有兔大於常兔見於橋上人捕

之不得殆兔仙也所謂張香想非恆人不然世之桑間濮上者頗多何以得名耶

顧市巷顧雪窗先生居之明人也教授於此歸者如市里人目爲顧市有管先生能作反手書嘗爲先生

書一絕句於庭牆筆致甚奇今不復見先生光福鎮人載緝柳編

明王文恪公宅中芳草園今已荒蕪矣頽垣尙有忘庵寫墨牡丹遺蹟相傳忘庵嫁女寫花卉百幅爲隱

贈較古人練裳竹筍更爲清雅忘庵畫予嘗見其早年作者款書王武或書王憲武或云名會者其弟

也名書紳字鶴孫其子也俱工花鳥嗣其家法

會位作

西街逍遙街高殿庵比邱尼居之秋日桂花頗盛遊履紛紛中有古墳殘碣苔封不可辨尼云宋蘇小妹

埋香處

虎邱桐橋下有銘云元至正十五年金氏十一娘捐資建造又廣化寺橋南境有井銘嘉定改元六月閭門外有種痘祖師廟昔聞先伯萍蘆云種痘祖師爲峨嵋真人居蜀峨嵋山始教人種痘者蓋仙也柴河頭湯氏照牆有中山世里四字明范允臨書此宅係永福寺故址

婁葑之間有匠門塘匠門一名干將門其東有歐冶廟干將墓此門之所以名匠也載張楚門筆記嘉慶丁丑秋干將坊浚井得巨人骨或云干將埋骨處若其墓在匠門安知井中非莫邪骨耶

太湖濱香山有漢會稽太守朱買臣廟其貧困時採樵處也墓在浙江嘉興府東塔雷音閣後卽廣福講院案買臣見棄于其妻自係實事而潑水難收則古烈士傳齊太公妻馬氏故事也

太湖中馬蹟山昔秦始皇南巡曾登此今有馬蹟焉

蘇州府署正堂後隙地掘之如有覆夏屋者造屋其墟卽有火災案漢時因太守堂屢災遂塗以黃名曰黃堂正其地也或云下有春申君冢然攷地志春申君墓自在常州府之江陰縣君山麓不在此也

府署後有園卽古木蘭洲也宋談元先生云吳中無荔子獨此園有之昔太守孔公嘗取鮮荔支設宴并繪圖賦詩

虎邱一樹園薛微君一瓢別業也樹前有池環以林木竹石登樹而憑眺如臨鏡奩塔影山光歷歷入畫予有詩云一瓢居士此爲家水樹淩波石甃斜尚有客來敲屈戌時聞舡過奏琵琶苔暈冷金魚洗

紅杏花交玉畫又不見主人倍惆悵半畦藥草又生芽

師子林元天如禪師所築也疊石疏泉皆出倪高士故玲瓏奇險得峨帽雁宕景趣後之造園者莫能及也予聞內姪太倉陸蘊真云雲林既疊此山又以餘石疊於婁東人家今爲孝廉方正錢氏所居奇石林立亦得畫意又聞門人伍宗扶云師子林國初屬伍氏

樂橋之南大石頭巷不知大石所在一日值其巷口人家葺屋始見石在屋中正方如八仙桌其石質砂石耳俗傳孫吳時空中墮下者也

吳下大水歲饑多是納音屬土之歲爲至順庚午至元戊寅至正丁亥洪武丙辰理不可曉出農田餘話浙中天目山神形如白虎每歲五月與震澤龍鬪則多暴風雨或云會龍女也

陶貞白別錄蘭艸出太吳池澤又云太伯所居故曰太吳

三吳記孔安國問宅忽有二人來云自帝庭來謁一衣綠曰藤子一衣黃曰黃子與語吳大帝時事歷歷可聽及去遣人尋之入未央宮庭中衣綠入於藤下衣黃入於橘下案此則見唐人五色線所云孔安

國在吳大帝後必非西漢安國也云未央宮庭亦非西漢之未央必於吳事關涉故入三吳記姑存之盧氏雜記有達僚差軍將於浙西賈太湖石軍將申狀云前件石蚌艸二字甚奇不堪買五色線

潛夫論邊議篇云范蠡收債於故胥蓋胥者舜臣名佐禹治水有功封於吳者也太湖中有胥王廟故名其地曰

故胥後世轉音爲姑蘇而胥門之名見於左氏春秋非因伍子胥得名也姑蘇臺圖經亦作姑胥臺越

絕書又有胥母山似胥母所居

西子隨陶朱公去不知所終惟山東肥城志云西施洞在牛山蝙蝠洞西昔陶朱同西子登此山隱焉

有三十六洞

予謂東坡詩載去西施豈無意恐教傾國再迷君殊寓忠愛之忱而猶有未盡者蓋朱公知句

踐長頸鳥喙難與久居身既見幾而作恐西子他日華落愛淪貽他闢扇秋風之嘆不如攜手同行如神龍之莫見其尾耳

周旭筆記云廣化寺計五百畝相傳隋馬孫瑋尙文帝愛女妙嚴公主薨葬閭邱坊巷今息園中又云

捨宅爲寺今孫家園禪興寺其遺址也

俱虛

又載海東一老集所辨以爲梁簡文帝女爲賊臣候景所逼

尋景伏誅後公主染緇削髮轉僑旁郡終於是焉或云梁武帝女疑不能決乾隆時人有發其冢得兩

缸相合啓之骸骨已成灰可知公主之爲尼而周旭之說非矣但未知爲梁何帝女耳孫瑋別有墓及

宅蓋在鄰近也

長洲張霞房先生所著紅蘭逸乘皆吳中軼事郡志多未載入乃未刻祕本雖寥寥數卷大足以補志乘之闕深堪寶貴道光二十九年四月叔未張廷濟跋

右紅蘭逸乘殘稿一券自楊君壽祺處借鈔得之原本廣化寺一條以後紙幅割截而止疑並此卷亦非全璧王君佩諱檢北平文魁堂書曰有紅蘭逸乘四卷急函詢之則已售去良足惋惜張霞房事蹟未詳博雅之士考以見示則幸甚矣民國十九年夏鹿城陳子彝識於可園

6

11211

11